

## 每週經課朗誦經文(巴克禮台語漢字)2014/11/16

### 共同經課 - 1 士師記四章一節~七節

1 以笏死了，以色列人閣行耶和華所做歹的事，2 耶和華賣in佇迦南王耶賓的手就是佇夏瑣做王的；伊的軍長是西西拉，伊倚起佇外邦人的夏羅設。3 耶賓王有鐵車九百張。伊大大欺壓以色列人二十年，以色列人就求叫耶和華。4 彼時有一個女先知名叫底波拉，是拉比多的某，伊做以色列的士師。5 伊倚起佇以法蓮山地拉瑪及伯特利的中間，佇底波拉的棗樹腳。以色列人攏上去伊遐受伊判斷。6 伊差人叫亞比羅菴的子巴拉對拿弗他利的基低斯來，對伊講：「耶和華——以色列的上帝豈毋是命令講：『你著去他泊山導拿弗他利及西布倫人一萬及你去。7 我欲互耶賓的軍長西西拉及伊的車，伊的全軍到基順河你遐；我欲將伊交佇你的手。』」

### 共同經課 - 2 詩篇一百二十三篇 or 七十六篇

1 〔上崎仔的詩。〕坐佇天頂的主啊，我抬目向你。2 看啊，做奴僕者的目矚怎樣向主人的手，做奴婢者的目矚怎樣向主母的手，阮的目矚亦照按呢向耶和華——阮的上帝，直直到伊憐憫阮。3 耶和華啊，可憐阮，可憐阮！因為阮互人看輕，已經到極。4 阮的心互許個拉開的人冷笑，互驕傲的人看輕，已經到極。

### Or 七十六篇

1 〔亞薩的詩歌，交互樂官。用絲弦的樂器。〕佇猶大，上帝互人所識；佇以色列，伊的名做大。2 佇撒冷有伊的帳房；佇錫安有伊倚起的所在。3 伊佇遐邊折弓的箭，及盾牌、刀劍，以及交戰的家私。（細拉）4 你對搶物的山寨來，有榮光及威嚴。5 心勇敢的人攏受搶劫；in的暈是長長暈，英雄的人無一個會出手。6 雅各的上帝啊，你的責備一下發出，車、馬攏暈重眠。7 獨獨你是通驚者！你的受氣一下發出，是誰佇你的面前倚會住啊？8 你對天裡互人聽判斷。地就驚惶靜靜，9 就是上帝起來審判，欲救地上一切謙卑的人。（細拉）10 人的受氣的確互你得著謳喏；其餘的受氣，你欲禁止。11 恁著對恁的上帝——耶和華下願閣謝願；四圍的人著帶禮物貢獻佇通敬畏的主。12 伊欲遏止貴族的驕氣；伊互世上的列王驚畏。

### 共同經課 - 3 帖撒羅尼迦前書五章一節~十一節

1 兄弟啊，論到時期，毋免寫批互恁；2 因為恁家已詳細知，主的日到，親像賊透暝來。3 人當啲講「平安穩當」的時，災禍忽然到佇in，親像生子的艱苦到佇有娠孕的婦仁人一樣。in許個人袂會走離。4 若是兄弟啊，恁毋是佇暗的中間，致到彼日親像賊來趁著恁。5 因為恁攏是光明的人，日時的人。咱毋是屬乎暝時的，也毋是黑暗的。6 所以咱毋通親像其餘的人暈暈，著警醒節制。7 因為暈的人是暝時暈，酒醉的人是暝時醉。8 若是咱屬日時的著節制，穿信及仁愛做護心鏡，用得救的向望做頭盔。9 因為上帝定著咱毋是來抵著受氣，就是欲對咱的主耶穌基督來得著救。10 伊替咱死，互咱或是醒、或是暈，及伊同活。11 所以，著相安慰，大家相建立德行，照恁所啲做的。

### 共同經課 - 4 馬太福音二十五章十四節~三十節

14 「因為親像一人欲去外國，就召伊家己的奴僕，將所有的交代in；15 一個互伊銀五千，一個互伊二千，一個互伊一千，各照in的才調，就去外國。16 領五千的隨時去做生理，閣趁五千。17 領二千的亦是按呢閣趁二千。18 獨獨彼個領一千的去就掘地，來囤密伊的主人的銀。19 過久久，諸個奴僕的主人到，及in算數。20 領五千的來閣帶五千，講：『主啊，你交代我五千。你看，我有閣趁五千。』21 伊的主人給伊講：『好啊，好閣盡忠的奴僕，你佇少的已經盡忠，我欲設立你來管多的；通入你的主人的快樂。』22 領二千的亦來，講：『主啊，你交代我二千。你看，我有閣趁二千。』23 伊的主人給伊講：『好啊，好閣盡忠的奴僕，你佇少的已經盡忠，我欲設立你來管多的；通入你的主人的快樂。』24 領一千的亦來，講：『主啊，我知你是嚴轄的人，未撒的所在就欲收割，未分散的所在就欲拾做堆，25 所以我驚，就將你一千銀去埋佇地裡。今你的原物還你。』26 伊的主人就應伊講：『歹閣貧憊的奴僕啊，你既然知我無撒的所在就欲收割，未分散的所在就欲拾做堆，27 就著將我的銀下佇錢店，我來的時，通得著我的本銀及利息。28 所以著對伊提彼一千來，互彼個有十千的。29 因為見若有的，欲互伊，互伊有剩；無的，連伊所有的亦欲提伊。30 亦彼個無利益的奴僕趕伊佇外面黑暗的所在；佇遐欲有啼哭咬牙切齒。』」